

欽定剿平粵匪方略

欽定勦平粵匪方略卷一百九十四

戊午年

四月二十日

乙丑

官文都興阿胡林翼奏言九江

形勢西扼武昌東引皖口實南昌之頭目而湖廣江南之腰膂也得之難守之亦不易應由鄂省留兵代防湖口彭澤小孤山華陽鎮均爲九江之屏蔽湖口尤爲彭蠡之咽喉自昔經畫江南必以此爲重鎮亦應由鄂省分兵代守鄂省

以五萬三千人戰於江皖不僅兵事無分畛域
卽餉需亦不容推諉惟查九江地方善後事宜
極有關係必得廉幹大員以資鎮撫且鹽課關
稅經理得人亦可稍助軍需東征之師應於九
江設轉運糧臺則軍餉軍火由鄂起運者中道
有歸宿之處呼應較靈轉輸亦捷查有本任廣
饒九南道沈葆楨忠直廉幹才堪應變現駐廣

信府城應請

旨特派沈葆楨辦理九江轉運糧臺並飭速回九江本
任實於地方軍務均有裨益李續賓擬酌帶湘
軍及撫標各營渡江先清皖北而後再議皖南
皖省自宿太以及舒桐賊勢蔓延已久且與廬
州文報不通楚軍遠征錢糧軍火均有本營長
夫自行運送惟是深入皖境離江岸較遠則米

糧軍火轉運不易且李續賓每逢大戰必豫飭
各營添募民夫趕運一月軍需故能與賊久持
而操縱在手不虞匱乏客兵遠征若無地方大
員隨同照料呼應不靈應請

飭下安徽撫臣迅派廉明大員繞赴都興阿李續賓行
營另設隨營支應局會同湖北委員經理庶統
兵大員不致分心軍需得以一意討賊所復皖

省州縣除緊要關隘外必難處處代守應及時
設立官長舉行團練以資得力至湖北分戰分
守月餉二十六萬有餘加以每月協濟湖口彭
玉麟吉安劉騰鶴等軍餉二萬餘兩七年設局
造船製辦軍火軍裝本年二月後九江之雲梯
地道工費俱繁卹賞尤鉅卽如兩月之內費火
藥礮子各五十餘萬斤其餘軍裝無一不取給

於鄂省每月所需已逾三十萬兩其分濟李孟
羣李元度各營軍餉尙不在此數內本省竭力
籌畫實已不遺餘力查山西陝西四川每月奏
定協餉各五萬兩均未如數如期以東征江皖
五萬餘人之食責之湖北一省力實未逮應請
飭下四川山西陝西迅速協濟庶東征之師免致匱乏

奏八

上命軍機大臣傳諭官文都興阿胡林翼福濟曰本日據官文等奏九江湖口等處由鄂省分兵防守李續賓擬酌留兵勇渡江先清皖北再議皖南並於九江設立糧臺轉運軍火等語所籌進剿機宜與前降諭旨相符其以九江爲扼要更屬切中形勢卽照所議辦理惟九江道沈葆楨久在廣信深得民心現在江西賊匪竄入浙境廣信郡城正當喫重沈葆楨未可

調回本任所有九江設立糧臺著官文胡林翼另派廉幹大員妥爲經理至楚兵深入皖境米糧軍火必須地方官員隨同照料呼應較靈卽著福濟派員繞道分赴都興阿李續賓行營設立隨營支應局會同楚省委員辦理其糧餉等項恐皖省無從措辦仍著由湖北籌撥接濟至各州縣克復以後自難處處留兵防守著卽責成福濟慎選賢良安輯難民辦理團

練自行保衛儘有竄匪卽由皖兵策應方可以次肅清福濟務當振刷精神悉心籌畫以期相與有成

上又命軍機大臣傳諭王慶雲恆福曾望顏曰湖北省進剿江皖賊匪派出兵勇約有五萬餘人月費軍餉爲數不貲現在九江郡城業已克復李續賓等卽日移師東下越境追剿餉需尤不可缺著王慶雲恆福曾望顏查明各該省應解湖北軍餉迅速陸續籌解

官文都興阿胡林翼又奏言皖省大股逆匪竄
陷麻城廣築堅壘以阻我師三月二十七日李
續宜督軍抵麻城後連日審察地勢與副都統
舒保會商進兵於四月初二日飭副將張文煥
進攻各門賊壘李續宜自率湘副中等營爲伏
兵舒保自率馬隊往來策應該逆率衆抗拒我
軍極力勦殺連斃悍賊百餘人賊敗入壘兵勇

奮往直前力攻三時踏破北路各壘殺賊一千數百名乘勝攻破東路賊壘殺賊千餘名西路官兵聞東北兩路得手愈攻愈力都司謝國俊等首先登壘中礮陣亡各勇奮力衝入立將西路賊壘焚燬殺賊二千餘名賊奔赴南門守壘張文煥奮不顧身大呼先登已入壘牆中礮殞命各弁勇憤極猛攻搃斬悍賊千餘南路賊壘

一律毀平統計是日殺賊五千餘名生擒七百餘名查麻城踞賊勢甚猖獗經舒保李續宜等合力攻剿埽平堅壘逆膽已寒仍飛飭舒保等激勵士卒迅圖克復縣城副將張文煥等血戰陣亡均堪憫惻先行開列擬請分別交部議卹其在麻城所屬黃土岡等處陣亡之都司胡達千總李子珍請一併交部從優議卹奏入

上諭內閣曰此次官軍攻剿麻城賊匪大獲勝仗各路
賊壘一律毀平勦辦甚屬得手著官文等督飭舒保
等激勵士卒乘勝迅克縣城盡殲醜類副將張文煥
中礮陣亡尤堪憫惻著交部照總兵例議卹陣亡都
司謝國俊著照遊擊例議卹千總熊世定著照守備
例議卹把總許國泰杜志立朱瑞武黃梅素均著照
千總例議卹外委李承祿周楚德均著照把總例議

卹其在黃土岡等處打仗陣亡之都司胡達千總李
子珍均著交部從優議卹

同日福興奏言臣於本月初四日約總兵饒廷
選等在浮石渡北岸分道進剿該逆因宿雨初
晴不料官軍驟至都司馮日坤等督軍進逼直
抵外濠拔開鹿角一擁而進該逆不能抵禦向
營外狂奔遊擊楊國正等復率勇從河沿橫截

而來該逆越濠遁走我軍從後追殺賊骸枕藉
臣親率各軍繼至直前衝擊賊衆撲入河中溺
斃甚衆其後面山上賊營數座該逆拜命死守
官軍殲斃二百餘人前竄杜澤之賊復分股擾
至東北高家一帶查該處緊接河壩爲郡城餉
道亟應迅速蕩除查有遊擊王恩榮一軍尙在
樟樹潭扼紮該處距高家祇十餘里卽飭該遊

擊就近堵截臣一面督軍進剿西北岸賊匪使
高家之賊未敢孤軍深入初六日杜澤之賊果
以北路巢穴被燬卽將高家一股撤回冀赴西
北岸援應臣於初六日飭楊國正等兵勇進剿
行抵冀家埠該逆糾集悍賊六七千人列隊以
待官軍奮力迎剿見左路賊隊空虛卽飭副將
張騰蛟等從旁抄出燒燬賊營賊匪回顧立卽

驚潰將龔家牟花園岡等處賊壘十一座一律
踏毀查賊竄西北一帶意圖攻撲浮石渡營壘
合因郡城故江常兩路匪蹤方且源源踵至幸
各軍連日進攻將西北賊巢焚燬淨盡洵足大
振軍威現因大雨未能進兵俟晴霽卽與饒廷
選等督率各軍相機進剿

同日晏端書奏言處州府屬之遂昌縣與西安

江山龍游接壤臣前咨請福興派兵往守並經周天受入城商請適因衢防喫緊無兵可分詎南路之賊已繞竄龍游卽經周天受明安泰先後馳勦獲勝乃大股之賊已從靈山竄往遂昌周天受等以遂昌爲進竄金處之路由湯溪馳赴金華迎頭堵禦而賊已於三月二十一日竄遂昌二十三日竄松陽周天受等於二十四日

趕至金華探知賊已竄往處州周天受由武義
前往宣平明安泰由永康縉雲前往桃花嶺分
路會剿乃處州府城復於二十七日失陷查處
州所屬各縣多與閩省毗連現在閩省浦城松
溪政和俱失則處屬之龍泉慶元等縣均屬可
危周天受明安泰兩軍益以甯防及金陵調到
各軍統計不足四千兵力尙單臣已飛囑其相

機會攻嚴防下竄金華之路現俟甯防續調吳
再升楚黔勇一千二百名到浙派赴壽昌合楊
名聲各隊圖勦東竄之賊和春前派周天培統
帶兵勇一千餘名指日當可到浙並准江西撫
臣耆齡咨稱已派兆字營兵勇一千餘名赴玉
山會勦業經飛札催提連日接繆梓來稟福興
親督浮石渡各隊並挑選衢防勇丁奮勦先後

踏平賊營十一座如果從此剿辦應手當可立
解城圍惟此時浙省軍情衢州與金華並重衢
州之賊已延入處州圖竄金華雖經周天受等
迎擊亦僅能遏東路一面而宣平武義湯溪龍
游皆有由衢處進犯金華之路實屬防不勝防
此時祇能就現有兵力分路布置須俟旬日內
援師大集再行添兵扼守並由遂安壽昌出隊

截擊庶內犯無虞可以徐圖進剿至失守各府縣容臣查明被陷情形及各該文武下落再行分別覈辦均奏入

上命軍機大臣傳諭福興晏端書周天受曰前因常山失守玉山聲息難通福興專顧衢州恐與江西隔絕特命該將軍將原帶之兵酌分一半回駐玉山並派周天受督辦浙江軍務今覽福興及晏端書奏報似

皆未接奉前旨而軍情旦夕變遷處州旣陷周天受已遠赴東路福興在衢尙能壘獲勝仗著卽暫留該郡俟東路賊情稍鬆周天受力能兼顧該將軍再赴玉山賊旣闌入處州金華喫重龍游又須防堵兵分力單深恐難資禦侮桃花嶺爲由處州下竄要隘明安泰旣由此前進卽著嚴扼此路俾賊衆不能竄出金華然後周天受親統全軍分路進剿可期得手衢

州雖獲勝仗而江常兩路匪徒源源踵至著該將軍督飭饒廷選等奮勇進剿漸次廓清該撫所調甯防勇一千二百名並江南撥來周天培所帶兵勇一千餘名指日到浙江江西所撥兵勇一千餘名亦當調到兵力實已不少總須布置得宜方能兼顧周天受膺此重任著與晏端書統籌大局以保全浙至處州府及失守各縣文武下落並著該撫查明具奏

晏端書又奏言徽防兵勇經張芾節次抽調交
周天受等帶赴三衢援勦祁門婺源不免空虛
崇覺寺逼近青陽尤爲喫緊張芾飭令參將吳
偉奇加意嚴防三月十一日青陽逆匪糾衆由
分蘊嶺進竄陵陽鎮吳偉奇督同遊擊張應超
等挑選奮勇三面合擊該逆拌力死拒張應超
躍馬衝出槍斃紅衣馬賊一名逆衆驚潰我軍

乘勝追過陵陽鎮十餘里餘匪仍敗往分鑪嶺而去十二日該逆又糾合大股二三千人竄過陵陽鎮並分路圍撲各營盤勢甚猖獗吳偉奇飭令兵勇施放槍礮連斃悍賊數名張應超分帶隊伍包抄截擊斃匪二百餘人逆衆紛紛敗竄我軍追至分水嶺一帶始行收隊現仍飭吳偉奇督飭將弁認真守禦以防回竄奏入報

二十一日 丙寅 德興阿奏言四月十二日謀報全

椒之賊由湯泉徑撲高旺經英貴烏爾恭額帶
隊迎勦賊卽折回我軍跟追接仗頗有斬擒是
日和州之賊由烏江竄至石磧橋 臣卽飭令海
全帶領馬隊馳往協勦並令成明等趨赴前敵
不使九洲洲賊匪乘虛窺撲 臣親督諸軍星馳

前往四更時行抵高旺聞賊欲犯該處卽由石
磧橋進擊該逆并死迎戰官兵連開槍礮繼以
刀矛賊勢不支紛紛敗遁約斃賊二三百名臣
親至石磧橋察看地勢遂留海全一軍暫紮石
磧橋臣於十三日回營伏思石磧橋爲江浦門
戶當調穆克登額馬隊二起魁霖步隊一千名
馳回浦口扼紮石磧橋與高旺官軍互相聯絡

庶全椒和州之賊不敢妄生窺伺臣又以滁州爲浦營後路密約鞠殿華於烏衣東葛一帶出隊巡哨適遇滁州之賊往迎全椒火藥而全椒運藥之匪亦至兩股約二千餘人鞠殿華帶隊先驅台斐音保等督兵繼進分投撓勒共斃賊八九百名生擒長髮悍賊六十二名奪獲火藥四百餘斤惟該逆旣經挫折必將改圖設併股

合趨江浦則浦營有三面受敵之虞惟有與翁
同書鞠殿華設法維持迅殲醜類奏入報

二十三日戊辰勝保袁甲三奏言捻逆踞六安州

城疊次勾結粵逆互相抗拒經臣等於本月十

二日將州城克復惟捻首尙在稽誅餘孽亦未

淨盡臣袁甲三奉

諭令樂斌揀調馬隊二百名遴選得力員弁管帶前來聽候調遣並諭樂斌酌量情形如能添撥更爲得手現在吉林黑龍江馬隊無可再調德興阿旣經挑選膽壯馬匹分配綠營習練督戰著有明效著再行挑選操練以期多多益善茲已通諭官文勝保福濟伊興額等軍營一體照辦矣

上又命軍機大臣傳諭官文都興阿勝保袁甲三福濟

德安伊興額史榮椿曰本日據德興阿奏於滿營馬
隊外挑選臚壯馬匹分派綠營習練臨陣頗資得力
等語因思軍營馬隊不敷均可照此辦理旣免徵調
之煩兼可漸增勁旅著官文都興阿勝保袁甲三福
濟德安伊興額史榮椿等各就所部兵勇中挑派精
壯兵丁操練馬隊以期得力

上又命軍機大臣傳諭樂斌曰現在江北勦辦逆匪馬

隊不敷應用著樂斌於陝甘督提二標挑選馬隊二百名派委得力將弁配齊軍裝器械迅速管帶起程前往德興阿軍營聽候調遣並著樂斌酌量情形如能於二百名外多爲添撥更足以資攻勦

德興阿又奏言本月十五日烏江賊匪糾和州賊黨徑撲石磧橋記名副都統海全協領烏爾恭額等帶兵奮擊追至烏江記名總兵英貴帶

領馬隊由高旺馳至該逆分股排列海全直擣
中堅官軍四面兜裏殲殺殆盡海全並派義勇
首先薄壘拋擲火器火光四起諸壘悉下賊匪
自相踐踏及淹斃者無算其逃竄對河賊二千
餘名分排南岸我軍過河直撲賊壘居民幫同
殲殺南岸各壘亦登時俱毀其由小徑奔赴和
州者經官軍追至赤泥壩地方盡力殲除海全

馳突賊中手刃尤多共計斃賊三千餘名生擒
五百餘名烏江賊壘一律踏平查浦營兵力本
單乃以數百之兵破數千悍賊實非意想所期
記名副都統海全忠勇誠實力挫兇鋒仰乞

天恩破格獎勵記名總兵英貴等先行開列籲懇

恩施其餘出力員弁兵勇容臣查明彙案保奏奏入

上諭內閣曰此次官軍攻克烏江賊巢大獲全勝勦辦

甚屬得手記名副都統海全力挫兇鋒奮勇可嘉著
賞給頭品頂戴記名總兵英貴著賞給庫奇勒巴圖
魯名號協領烏爾恭額著交軍機處記名以副都統
用佐領慶春著以協領儘先卽補協領舒通額著賞
加副都統銜富明阿著賞給霍欽巴圖魯名號都司
劉潤著賞換花翎守備蔣光烈著賞加都司銜其餘
出力員弁兵勇著德興阿彙案會保

同日耆齡奏言逆匪竄擾鉛山廣豐關入浙境
業經臣先後抽調兵勇八千餘名馳赴東路援
剿嗣又遵調副將田興恕統領虎威軍二千餘
名馳赴玉山會同李元度攻剿常山赴援衢郡
九江鎮總兵李定太一軍自豐城步步爲營且
勦且前於三月二十日進紮臨川縣潯津嶺地
方以扼賊竄豐城樟樹鎮之路原未便遽行撤

動乃田興恕忽患目疾甚重前來省寓醫治急切難以起身臣通盤籌畫浙江衢州之賊尙未擊退全局攸關何敢不力籌兼顧江西撫郡攻勦方殷亦難過於抽撤現擬飭文瑞率領所部二千餘人隨同李定太赴援浙江以田興恕之虎威勇與元善之平江勇填紮滄津嶺約會蕭啟江各營圍逼撫郡並由省撥兵五百名馳往

新淦添集該縣團勇防守縣城據李定太咨報
已於四月初一日拔營現在籌給行糧兼程前
進行抵玉山再酌帶駐紮該處之長左等營練
勇合力進剿先行撲滅常山踞賊再解衢郡之
圍李元度率領平江勇於玉山廣豐一帶爲李
定太後路聲援並防賊匪回竄廣信如弋陽貴
溪有警亦可就近策應准浙江撫臣來咨合計

衢防及江西徽州江南援兵共一萬九千餘人
三月十二等日已三次獲勝大挫兇鋒加以李
定太全軍會剿當易翦除撫建兵勇抽調稍單
並聞闖入福建股匪有由光澤回竄新城之謠
將來衢州解嚴後李定太應卽統帶全軍仍回
撫郡會剿或由金谿直擣建昌臨時相機進取
庶免顧彼失此

耆齡又奏言臣以潯郡地處長江腰膂爲金陵上游關鍵曾經札商李續賓代募勁旅以資克復後防守之用嗣據稟覆俟攻拔郢城酌留數營或再添募若干等語茲郢城業已克復應卽趕辦現委臬司惲光宸剋日馳往潯郡會商李續賓將留兵募勇防守各事妥爲布置並酌量犒賞各軍一面督飭該府縣將善後事宜次第

辦理奏入均報

二十六日辛未何桂清奏言現在浙江賊勢大股

東趨福興一軍雖將圍衢之賊節次勦洗而旁
竄愈多壽昌遂安龍游蘭溪處處告警防不勝
防明安泰部下之副將李嘉萬進紮離處州二
十里之銀場地方爲賊所困周天受馳往救援

因天雨賊衆以致知府唐寶昌都司馬元鎮秦
坤及健卒多名同時陣亡周天受亦身受重傷
仍親身殿後力戰始能全軍以退嚴守金華府
城刻下明安泰一軍並由金陵續派之總兵周
天培一軍會同周天受保固金華再由永康縉
雲步步爲營逐漸進取此路似可無虞惟周天
受雖督辦浙江防勦事宜止能力竭東路無暇

顧及西路衢嚴一帶且與福興一軍有主客之勢而明安泰饒廷選之資格均在周天受之前恐其呼應不靈晏端書有籌措兵餉彈壓地方之責不能不坐鎮省城現由金陵大營撥去兵勇已逾五千徽甯兩營調撥兵勇亦已逾萬分防各處尙嫌其少即使再行添撥而事權不一有損於江南無益於浙江因思晏端書前曾奏

請

飭下張國樑援救浙江張國樑爲金陵大營總統所有
營壘濠塹皆其布置曾經和春奏明未可暫離
而和春威望更出張國樑之上江浙本屑齒相
依若令兼顧則聲威所至逆匪自聞而膽落可
否仰懇

大恩飭令和春督辦江南浙江軍務而以周天受幫辦

浙江軍務總統諸軍以一事權庶將竄浙之賊
乘其巢穴未固一鼓殲除冀可轉危爲安和春
赴浙時所有江南軍務暫由張國樑會同許乃
釗相機妥辦仍與和春往來函商不致鬆勁俟
浙省軍務起色卽可交周天受專辦和春仍凱
旋金陵臣因維持大局起見用敢冒昧瀆陳奏

上命軍機大臣傳諭和春張國樑許乃釗何桂清晏端
書周天受曰浙江賊勢東趨處州旣陷逆燄益張先
後由金陵大營撥去兵勇五千餘名徽甯兩處援兵
亦已逾萬前經降旨令總兵周天受督辦浙江防剿
事宜該員現在嚴守金華恐難兼顧江蘇浙江脣齒
相依設有疏虞有礙大局和春圍攻金陵布置已屬
周妥著卽馳赴浙江督辦江南浙江兩省軍務總兵

周天受著幫辦浙江軍務所有江南安徽江西援浙各軍均歸該大臣節制以一事權前命李續賓帶九江得勝之師赴浙援勦亦著歸和春調度和春赴浙後所有江南軍務卽著張國樑許乃鈞暫行會辦俟浙江軍務辦有就緒卽可責成司大受專辦和春仍馳回金陵該大臣聲威久著現在竄浙之賊乘其巢穴未固分飭各路帶兵大員一鼓殲除以保東南大

局朕有厚望焉

二十七日壬申王懿德慶端奏言浙省大兵雲集

該逆被勦窮蹙勢必狂竄閩省堵勦愈形緊急
現踞浦城及夢筆山一帶賊匪不下萬餘雖經
在防兵勇疊次擊退未能大挫兇鋒恐江山被
擊敗匪竄併浦城則建甯可危堵禦益形棘手
政和松溪之賊負隅抗拒汀州延平府屬各縣

勦辦正在喫緊兵力無可再分值此軍情萬緊
於無可抽撥之中飭令守備董連輝等帶兵勇
一千一百餘名委員陳維漢等帶廣勇五百餘
名暨前調海壇兵三百名福甯兵五百名均歸
遊擊袁良統率星夜馳赴政和松溪由臬司保
泰就近調度仍飛飭衢州鎮總兵饒廷選就近
確覈浙省軍情剋日酌撥勁旅問道前赴松溪

聞

浦城會剿以資得力奏入報

王懿德慶端又奏言江右逆匪關入閩疆攻陷
浦城據報署浦城縣知縣韓湛殉難其松溪政
和等縣先後失守迄今日久代理政和縣知縣
馬驥署松溪縣知縣陽椿究竟是否殉難抑係
潛匿何處尙未據該管知府查覆相應請

上從之

旨將代理政和縣事縣丞馬驥署松溪縣事同知陽椿
先行一併革職俟查明下落分別辦理奏入

同日晏端書奏言總兵明安泰一軍先已駐紮
桃花嶺其部下副將李嘉萬於四月初五日自
桃花嶺進紮銀場被逆衆圍攻經明安泰飭副
將陶茂森馳往擊退其時周天受自宣平行抵

銀場察看地勢不宜紮營飭令移軍巖泉因雨未敢移營初七日該逆復圍撲銀場周天受明安泰馳往策應逆衆又以大股分竄入嶺我軍合力抵禦雨勢更大火器難施短兵相接員弁兵勇傷亡不少官軍且戰且退當於縉雲途次收集隊伍回守金華再圖進取查桃花嶺險隘旣失內犯之路防不勝防周天受明安泰會紮

金華力顧龍游湯溪而永康爲縉雲後路兼通
義烏東陽一俟援兵調齊卽行進紮扼守現在
和春派援之周天培鄧紹良派援之吳再升兩
軍均已抵浙臣因壽昌緊接衢州北路卽飭吳
再升馳往防勦而以周天培一軍飭赴金華與
周天受合隊俾資策應江西援師耆齡已派總
兵李定太統帶長左仁右衡同兆字等營及新

衡勇建昌勇白玉山取道前來並經和春續派副將郭啟舉帶勇一千名赴浙助剿臣已委弁分別迎提至浙江防剿事宜奉

旨以周天受督辦此後一切軍情臣當會同通籌布置並與該總兵隨時聯銜奏報以期仰慰

聖懷奏入報

聞

二十九日

甲戌

福興奏言

臣

督帶援軍趕抵衢州

卽值江山大股逆匪撲近郡城經臣督同在城

各軍痛加勦洗並將各營分布浮石渡南北兩

岸乃該逆從東路繞出樟樹潭後竄至靈山又

由靈山竄擾遂昌松陽周天受明安泰等營繞

出湯溪以顧處州金華兩路其江南續派之參

將和順等一千餘人又經晏端書留防嚴州一

帶因此合計各路援軍雖不下萬餘人而四處
分防轉覺備多力薄刻下惟臣一軍駐紮北岸
自本月初五初六兩日將西岸逆巢焚燬淨盡
正擬乘勝速清東南兩路因連日陰雨未能進
軍江西撫臣耆齡前派九江鎮總兵李定太督
帶各軍來浙援應尙未知何日拔營應請

飭下耆齡嚴催李定太等軍趲程前進毋失事機其玉

山一路僅恃李元度平江四營且尙須防守廣
豐兵力愈形單薄臣已飛飭李定太卽就所帶
兵勇內酌留新衡勇兆字營一千餘人歸九江
道沈葆楨同知李元度就近調遣稍期厚集目
前衢郡城圍未解臣若遽行趕回江省則北岸
頓涉空虛臣權其重輕俟天色晴霽卽督軍進
攻若衢城賊勢稍退再行遵

旨回駐廣信玉山以免疏失奏入

上命軍機大臣傳諭福興曰衢州賊匪蔓延東南兩路
因連日大雨官軍未能進剿所有李定太一軍除已
由福興檄令酌留一千名歸沈葆楨等調遣其餘兵
勇爲數不少本日已諭知耆齡催令迅速前進矣福
興本擬俟衢州解圍後馳往玉山但現在江西兵勇
尙屬不少而福建自連陷浦城松溪政和後近復攻

破光澤竄擾邵武兵力較單不敷勦辦著福興俟衢州解圍後卽將原帶官兵五千名內分出二千五百名親自統帶赴浦城一帶相機進剿以分賊勢

上又命軍機大臣傳諭耆齡曰本日據福興奏已飭李定太酌留新衡勇及兆字營一千餘人駐紮廣信請飭催李定太全軍速赴衢州等語惟衢州無須多兵此外浙江需兵之處尙屬不少自應酌量分布著耆

齡卽飭李定太一軍迅速前進

同日王懿德慶端奏言據按察使保泰稟稱江西建昌瀘溪逆匪於三月二十一日突入鐵牛關隘代理邵武府知府匡開益等統軍援剿逆匪已於二十三日攻破光澤縣城圍撲郡垣經參將顧飛熊等督帶兵勇於二十四五六等日星馳赴援該逆占踞距郡四十餘里之和順一

帶地方復探聞二十七日逆匪直撲邵武郡城
署延建邵道趙印川督軍迎勦苦戰四時之久
斃賊甚多該逆敗退我軍甫在收隊賊復麕集
致被一擁入城等情查邵武爲閩省中權要地
四通八達今郡城旣經被擾建甯泰甯二縣固
屬岌岌堪虞該逆並可由建陽以窺建郡由順
昌以擾延平更難保不竄越甯化攻撲汀郡亟

應添調勁旅力扼要衝現派員管帶官兵八百
名馳赴延平會同在防兵勇歸道員袁績懋調
遣防剿以固省垣門戶仍飭將留防延平之都
司羅慶泰等管帶浙兵四百餘名前赴建陽協
同遊擊趙芳荊一軍會紮固守其現攻浦松政
三縣之軍勒限迅速收復庶免被賊牽掣一面
檄調水師提督兵六百名金門鎮標兵四百名

委護理海壇鎮總兵林向榮統帶由建陽馳往
邵武協勦參將惠壽管帶舟師五百二十名應
令折回順昌扼守以杜逆匪下竄並嚴飭汀州
鎮總兵剋日會撥兵勇扼紮甯化等處實力嚴
防

王懿德慶端又奏言閩省邵武光澤郡縣先後
被擾賊勢猖獗兵勇甚形單薄兼乏得力統帶

之員設有挫衄大局立時決裂相應仰懇

天恩飭下福興晏端書於無可抽撥之中調派勁旅三四千名並於周天受江長貴明安泰三員中酌派一員統帶取道來閩助剿以資厚集奏入

上命軍機大臣傳諭王懿德慶端曰江西逆匪竄陷光澤並有竄入邵武之信建甯逆氛四徧該督等調派精兵馳赴延平防剿以固省垣門戶並催速克政和

等三城以免爲賊牽掣所籌均尙妥協江長貴因甯國軍情喫緊業經調撥赴援周天受調度全浙軍務現在會同明安泰力扼金華斷難派令赴閩惟福興帶赴衢州兵本有五千前有旨令其將一半歸周天受調度一半由福興帶回玉山駐紮嗣因衢州一路周天受未能兼顧令其暫緩起程本日已諭知福興俟衢州解圍後卽帶所部兵二千五百名馳赴閩省

助勦該督等當先就現有兵力實力堵勦將失陷各城次第克復毋得專待援兵致滋貽誤

王懿德慶端又奏言上年江右逆匪闖入閩境曾經奏調粵省勁旅二千名來閩會勦迨被陷郡縣一律收復當卽飛咨停調旋因江西廣信軍情喫緊廣東派出之潮州鎮總兵壽山所帶兵勇二千名經西安將軍福興調往江右助勦

現在尙未起程而閩省又形緊急仰懇

天恩飭下廣東督撫臣迅飭該總兵壽山剋日統帶兵

勇二千名仍赴閩省汀郡一帶會合各軍協同

勦洗奏入

上命軍機大臣傳諭黃宗漢曰據王懿德等奏閩省軍情緊急請仍飭壽山領兵二千名馳赴汀郡一帶會勦等語著黃宗漢卽飭該總兵將原派兵勇二千名

迅速帶赴汀州一帶會合閩兵堵剿毋稍延宕

同日福建提督楊載福奏言現在九江旣復臣
應卽會合江甯將軍都興阿馬步隊伍相輔而
行急趨安慶本月十七日臣親赴黃梅城外都
興阿行營面商進剿機宜據稱刻下陸師惟以
援剿麻城肅清北岸爲先駐皖官軍防剿太湖
石碑各路尤爲緊要總須楚境後路稍清酌調

兵勇方敷數路分布等語自是實在情形都興
阿所率一軍暫時不能與水師並進而李續賓
已於十六日率領大隊前赴麻城其留駐九江
者分紮小池口及彭澤等處各要路僅足防守
亦必俟楚境肅清始能會合東下是臣水師暫
無陸營相輔前進勢難先行進駐下游若稍稽
遲又慮安慶之賊得以任意出入查安慶上一

百三十里之華陽鎮爲防江要地臣卽於二十
五日率領礮船進駐其間以爲老營不時率領
數營出擊使安慶之賊刻刻戒嚴不遑他顧俟
北岸稍清再與馬步隊拔營前進惟查江西吉
安撫州等府賊匪尙多麻城又大股叢聚旁侵
黃安值此江水盛漲均恐由小港竄出長江阻
我餉道臣已分派三營水師巡防黃州以上江

面另撥二營駐守彭澤之小孤山猶慮相距寫
遠兵力尙單且控馭不可無人因留彭玉麟督
六營暫駐湖口策應內外江面差免回顧之虞
得盡專攻之力奏入報